



**Meeqqat 18-nit inorlugit ukiullit kinguaassiuutitigut atornerlunneqarsimasut, taakkunungalu angajoqqaajusut/akisussaasut, tarnip nakorsaanik piaartumik ikiorserneqarnissamik periarfissaqalernissaannik pisinnaatitaaffeqalernissaat pillugu nassuiaasioqqullugit Naalakkersuisut peqquneqarnissaannik Inatsisartunut aalajangiiffigisassatut siunnersuut. Misissuineq periuserineqarsinnaasunik saqqummiussisussaq piviusunngornissaanullu pisariaqartinneqartunik takussutissiisussaq, tamatumani aningaasatigut allaffissornikkullu kingunissai ilanngullugit, kingusinnerpaamik UKA2023-qarnerani Inatsisartunut tunniunneqassaaq.**

(Inatsisartunut ilaasortaq Anna Wangenheim, Demokraatit)

### **Siullermeerinnineq**

Naleqqamiit Inatsisartunut ilaasortaq Anna Wangenheim, Demokraatit, siunnersuutaanut qutsaviginiarparput.

Naleqqamiit maluginiarparput Naalakkersuisut nalunaarusiaat<sup>1</sup> 2021-imi Naalakkersuisunit saqqummiunneqartup, ilaatigut takutikkaa meeqqat peroriartornerminni atugassarititaasut qanoq inuunerannut sunniuteqartigisarnersut. Assersuutigalugu meeqqat kinguaassiuutitigut kannguttaatsuliorfigineqarsimagaangata alliaratornerminni imminut toqunnissaminnik eqqarsarnissamut, imminut toqoriaraluarnissamulluunniit qaninnerulertartut – ikiorneqarnerallu amigartillugu naggataani imminut toquttarlutik.

Eqqarsaammernanngitsuunngilaq 2021 – imi meeqqat 249-t<sup>2</sup> kinguaassiuutitigut kannguttaatsuliorfigineqarsimasut akornanni qassit annaariaannaavagut ikiorserneqarnerat naammannginnera peqqutaalluni.

Ikiorsiinerit naammanngikkaangata akisunaartarpagut allaat inuunermik erlinnaqisumik akeqartarluni.

Pissutsit piviusut sakkortullutillu alianarluinnarput.

---

<sup>1</sup> 'Kalaallit Nunaanni 15-iniit 34-inik ukiullit akornanni eqqarsataatsikkut peqqissuseq aamma peqqissuseq - peroriartornemi atukkat, illersuutitut pissutaasut aamma aarlerinaatinut pissutaasut pingaarutaat'

<sup>2</sup> Politiit ukiumoortumik nalunaarutaa 2021



Naleqqamiit nunani allani isumaqatigiissutit atuutilernissaat imminermik ajortussaqaartinngilarput. Maluginiagarpulli, siunnersuuteqartoq isumaqatigalugu, tassaavoq assaat kialaartut amingaataanerat. Tarnip nappaataanut nakorsat aamma tarnip pissusaanik ilisimasallit amingaataapput.

Naleqqami maluginiagatta ilarivaat 2015-imili peqqinnissarfimmi tarnikkut nappaatilinnut immikkoortortaarfik (ulluinnarni A1-imik taajugarput) allineqarnissaanik nutarterneqarnissaanillu politik-ikkut suliniuteqartoqarnera. Kiisa 2022-imiipput sanaartornermillu suli aallartittoqarani. Meeqqat tarnimikkut napparsimasunut/katsorsagassanut atugassarititaasunut aaqqiissuteqartoqarnissaannik utaqqqissinnaanngillat – inuunermimmi akeqartarput. Sanaartorneq aningaasalersorneqarli aallartinniassapput – nangaassutissaqanngilagut.

Tarnip nappaataanut nakorsat meeqqanik katsorsaanissamut immikkut ilisimasallit amigaatigineqarput – Danmark-imi allaat amigaatigineqarlutik aamma. Aningaasaqarnermut Siunnersuisoqatigiit ippassaninnguakkunni saqqumiinerminni aamma oqaatigaat siunissaq qaninnerusoq isigalu nunarsuartsinni sulisoqarniarneq ajornartorsiutaalissasoq aamma nunatsinni. Taamaattumik sulisussarsiornitsinni Danmark-iinnaanngitsoq nunalli allat suleqatigalugit sulisoqarniarnissaq suliassaavoq utaqqisinnaanngitsoq!

Siunnersuutip imarisaa Naleqqamiit isumaqatigaarput - UKA23-imulli nalunaarusiamik utaqqinissaq apeqquserlugu.

Suleriuseq sukkanerpaaq Naleqqamiit pisinnaasoraarput aningaasanut inatsimmi pingaarnersiunikkut, sulisunut pisariaqartitanut aningaasanik immikkoortitsinikkut atorfinitsitsipallassinnaanissaq.

Piffissaq sukkanerpaaq atorlugu sulisussarsiorneq aallartereertariaqarpoq – inatsillu aaqqinnissaa saniatigut suliarineqarnissaa inassutigaarput.

Taamatut Naleqqamiit oqaaseqarluta siunnersuut ataatsiminiititaliamut susassaqaartumut ingerlateqqinnissaa inassutigaarput.